

Sis da set parlamentarisch grischuns han lobbyists a Berna

■ (rtr) Be il cusseglier dals chantuns *Martin Schmid* n'ha betg surdà sias chartas d'admissiun. Ils auters cussegliers naziunals e dals chantuns han tuts surdà lur badges. Tenor la lescha dal parlament ha mintga parlamentari svizzer la pussaivladad da surdar duas chartas d'admissiun en la chasa federala. Quai ha dà da discutir ils davos dis pervia dal cas enturn la cussegliera naziunala *Christa Markwalder* e l'agentura da PR *Burson-Mars-teller*.

Il cusseglier dals chantuns *Martin Schmid* ha desistì da surdar sias chartas d'admissiun. Betg perquai ch'el fiss encunter lobbying, mabain perquai che mintgin possia s'inscuntrar cun ils parlamentarisch durant las sessiuns era senza tallas chartas. En pli haja quai oz memia blera glied en la chombra avant la chombra dal cussegl dals chantuns, ha declerà *Schmid*.

Tut auter han decidì ils tschintg cussegliers naziunals ed il segund cusseglier dals chantuns, *Stefan Engler*. Els han tuts surdà lur badges. Tge che croda en egl è che *Heinz Brand* ha surdà sias chartas a collavuratur persunals. In badge ha *Beda Egger*, anteriur collavuratur da l'Uffizi da migraziun grischun survegnì, l'auter la directura da Santésuisse, *Verena Nold Rebetz*. Ella avess *Brand* era pudì registrar sco represchentanta da Santésuisse. Sin il formular n'haja quai dentant betg dà ina gronda schelta dad inditgar quai, ha declerà *Brand*.

Josias Gasser ha surdà in da ses dus badges a l'agentura da marketing *Pluswert GmbH* che porscha tranter auter era lobbying. Da congualar quella cun l'agentura internaziunala ch'era vegnida en las lingias grassas ils davos dis saja dentant fauss, ha el ditg sin dumonda. I sa tractia d'ina agentura da Cuir che s'occupia cun temas sco energia, traffic ed agricultura.

Cussegliers naziunals

Heinz Brand (pps)

- *Beda Egger*, collavuratur persunal
- *Verena Nold Rebetz*, collavuratura persunala

Martin Candinas (pcd)

- *Christoph Hans*, Hotelleriesuisse
- *Matthias Dietrich*, Posta

Josias Gasser (pvl)

- *Christof Dietler*, Pluswert GmbH
- *Peter Schuhmacher*, GEO Consulting Group AG

Hansjörg Hassler (pbd)

- *Martin Rufer*, Uniun purila svizra
- *Martin Andreas Senn*, Uniun svizra dals impressaris

Silva Semadeni (ps)

- *Marcus Ulber*, Pro Natura
- *Marcel Liner*, Pro Natura

Cussegliers dals chantuns

Stefan Engler (pcd)

- *Fadri Ramming*, Conferenza da las regenzas dals chantuns alpins
- *Thomas Egger*, Gruppa svizra per las regiuns da muntogna